

DECRETUM, ET BULLA

NOVAE ERECTIONIS, SEU REINTEGRATIONIS ARCHIEPISCOPALIS ECCLESIAE MATERANEN
CUM UNIONE AEQUE PRINCIPALITER

ECCLESIAE ARCHIEPISCOPALI ACHERUNTINAE.



INNICUS DIDACUS Miseratione Divina Episcopus Praenestinus, Commenda-
tarius S. Augustini, S. R. E. Cardinalis Caracciolo a SS. Domino Nostro
Pio Papa VII. ad infrascripta specialiter Delegatus, etc.

INTER caeteras nonnullarum Sedium Episcopaliū suppressiones in Regni
utriusque Siciliae ditione citra Pharum per Literas Apostolicas incipientes =
DE UTILIORI = sub Datum Romae apud S. Mariam Majorem Anno Incarna-
tionis Dominicae 1818. quinto. Kal. Julii a SS. Dom. nostro Pio Papa VII.
expedias, ac per Decretum nostrum diei 8. Augusti ejusdem elapsi anni
executioni demandatas, ea quoque recensetur, qua Materanen Ecclesia al-
teri Metropolitanae Ecclesiae Acheruntinae olim sub uno eodemque Pasto-
re unita, perpetuo extincta fuit, et ipsa Civitas Materanen cum suo Ter-
ritorio et Dicecesi Archiepiscopali Ecclesiae Acheruntinae praefatae perpe-
tuo pariter adjecta et applicata. At idem SS. Dom. Noster precibus mo-
derni Archiepiscopi Acheruntini, nec non Capituli, Cleri, ac Populi uni-
versi Civitatis Materanen benigne inclinstus, rerum circumstantiis perpen-
sis, attentis quoque votis ac postulationibus Regiae Mjestatis FERDINANDI I.
Regis Regni utriusque Siciliae, pro reintegratione Pontificalis Cathedrae in
ipsa Materanen Civitate cum unione aeque principaliter Acheruntinae Ec-
clesiae, qua fruebatur, antequam per memoratas Apostolicas Literas ad
enunciatam suppressionem, et applicationem deventum fuerit, novas sub
Plumbo Apostolicas Literas ad effectum, ut supra, expediri mandavit te-
notis sequentis, videlicet:

PIUS EPISCOPUS

SERVUS SERVORUM DEI AD PERPETUAM REI MEMORIAM.

Ex misteriosa per eum, qui sedet ad dexteram Majestatis in excelsis, cuique data est a Patre omnis potestas in Coelo et in Terra Petro Apostolo suo, ejusque Cathedra veritatis magistra usque ad consumationem Saeculi successoribus canonice insessuris clavium traditione, Romani Pontifices ad supremum Ecclesiarum omnium regimen evecti inter gentes jugi aquarum sapientiae haustu perpotandas, diversis licet agri Dominiq̃ finibus circumscriptas, unicum Antistitem veluti lampadem de modio subvectam, ac candelabro superpositam quandoque constituere; ac insimul praecipuas nobiliorum Civitatum Ecclesias Archiepiscopali Cathedrae honorificentia quandoque etiam decorare, quandoque vero illas peculiari, aliaque rerum circumstantia ad humiliora prolapsas, tunc eo magis cum ad id pia Christianorum Principum vota accedunt, in pristinum dignitatis fastigium revocare consuecunt. Inter caeteras siquidem nonnullarum Sedium Episcopaliu suppressiones, quas Nos post initam die 16. mensis Februarii anni Domini proximi praeteriti cum carissimo in Christo Filio nostro FERDINANDO Regni utriusque Siciliae Rege Illustri Conventionem in ejusdem regni ditione citra Pharum faciendas decrevimus, ac Literis Apostolicis sub Datum Romae apud S. Mariam Majorem Anno Incarnationis Dominicae millesimo octingentesimo decimo octavo V. Kal. Julii expeditas a Venerabili Fratre Nostro Innico Didaco Episcopo Praenestini S. R. E. Cardinale Carneciolo nuncupato exequendas mandavimus, etiam illa recensetur, qua Materanensis Ecclesia alteri Metropolitanae Ecclesiae Acheruntinae olim sub uno eodemque Pastore unita perpetuo extincta fuit; et ipsa Civitas Materanen cum suo Territorio, et Dioecesi Archiepiscopali Ecclesiae Acheruntinae p̃sefatae perpetuo pariter adjecta, et applicata fuit. Apostolica autem hujusmodi dispositione a praefato Innico Didaco Episcopo Cardinale jam per nostrum decretum datum Neapoli die 8. mensis Augusti ejusdem anni plenae executioni demandata, factum est, ut tam Venerabilis etiam Frater noster CAMILLUS CATTANEO modernus Archiepiscopus Acheruntinus, quam dilecti etiam Filii Capitulum, et Canonici olim Metropolitanae, modo vero ad

statum simplicis Collegiatae Ecclesiae Materanen in hujusmodi suppressione reductum, et redacti, nec non dilecti quoque filii universus Clerus; Populusque Civitatis Materae pro obtinenda reintegratione Pontificalis Cathedralae cum unione Acheruntinae Dioecesi, qua ante praedictas Literas potiebatur, incensissimas Nobis obtulerint preces. Nec immerito quidem Nos in ea, quam gravibus de causis in supradicta ditione peragendam esse judicavimus Sedium reductione, Acheruntinam Ecclesiam prae Materanensi servandam esse decrevimus, quum Materana saeculo tantum Ecclesiae XII. a felicitis recordationis Innocentio Papa III. Cathedralae honore donata, Acheruntina vero a Divo Marcello Papa, et Martyre jam inde a Saeculo III. in Cathedralam erecta, atque ab Alexandro Papa II. praedecessoribus nostris ad Metropolitancam dignitatem erecta dignosceretur. Ratione tamen habita qualitatis ejusdem Civitatis Materae, quae inter loca, urbesque Provinciae Lucaniae praecipuum obtinet locum, utpote quae per tria milliaria in circuitu suos protendit fines, et duodecim millium animarum numerum complectitur: ac praeter antedictam olim Metropolitanam, modo vero Collegiatam Ecclesiam, cui Capitulum ex tribus Dignitatibus, ac viginti septem Canonicis confutatum deservit, aliam etiam Collegiatam, ac Parochialem, quae Capitulum quindecim Canonicorum numero efformatum habet, duasque alias Parochiales Ecclesias, ac bina virorum, tris autem mulierum Coenobia, et unum puellarum Conservatorium intra ejus maenia continet: ita ut tot tantisque titulis illustris singularum Sedis Apostolicae considerationis intuitum sibi promereri videatur. Nos igitur, qui divina disponente Clementia in summo Apostolatus apice nullo licet suffragio meritum locati super universas ipsius agri dominici partes sollicitudinis nostrae curas jugiter impendimus; ac ubi de Ecclesiarum multiformi titulorum qualitate insignium praerogativis agitur restituendis, juxta eorundem Principum desideria populorumque eis subditorum id petentium preces lubentissime obsecundamus, votis et postulationibus praefati FERDINANDI Regis etiam permoti, ac audita relatione dilecti pariter Filii Secretarii Congregationis Venerabilium itidem Fratrum Nostrorum S. R. E. Cardinalium rebus Consistorialibus praepositarum: atque praemissis omnibus circumstantiarum momenti undequaque perpensis, motu proprio, et ex certa scientia, de qua Apostolicae potestatis plenitudine Literas Apostolicas praefatas in ea

tantum parte, quae suppressionem, et extinctionem supradictae Ecclesiae Archiepiscopalis Materanen, illiusque adjectionem et unionem praedictae Ecclesiae Acheruntinae, ut praefertur, factas respiciunt: nec non circa suppressionem, extinctionem, adjectionem, et unionem huiusmodi clausulas etiam Derogatorias derogatorias in eisdem Literis contentas, ac irritantia decreta quaecumque desuper apposita dicta Apostolica auctoritate tenore praesentium perpetuo revocamus, et annullamus; visibusque et effectu penitus et omnino destituimus et vacuamus, ac destituta et vacuata esse et fore declaramus: ac Materanen Collegiatam Ecclesiam, illiusque Collegialitatem, ac Titulum, nomen, denominationem, et Statum Collegiatæ Ecclesiae: ita ut illa ex nunc deinceps Collegiata Ecclesia esse desinat, ac uti talis denominari, nuncupari, et haberi nequaquam possit, etiam perpetuo supprimimus, et extinguimus; illisque sic suppressis, et extinctis praefatam Collegiatam Ecclesiam in pristinum, in quo, antequam ad Statum Collegiatæ Ecclesiae redigeretur, omnino erat, statum restituendo, reponendo, et plenarie reintegrando, illam in Materanen Archiepiscopalem nuncupandam Ecclesiam, et in ea Sedem Archiepiscopalem Cathedram, et Dignitatem pro supradicto Camillo de novo ut infra futuro, et pro tempore existente Archiepiscopo Materanensi, qui eidem Ecclesiae, illiusque Civitati, et Dioecesi Materanen praesit, ipsiusque Ecclesiae Archiepiscopalis Suffraganeos Episcopos ad Provinciale Concilium, nec non Abbates inferiores, Praelatos, et alios ad Synodum convocet, ac omnia et singula iura, officia, et munia Archiepiscopalia habeat, et exerceat cum suis infrascripto Capitulo, Arca, Sigillo, Mensa Archiepiscopali, caeterisque Archiepiscopalibus, et Pontificalibus Insigniis, jurisdictionibus, praecipue, praerogativis, privilegiis, et indultis realibus, personalibus, et mixtis, quibus praefatus Camillus de novo ut infra futurus, ejusque praedecessores Archiepiscopi Materanenses, antequam saepe dictis Materanen Ecclesia ad Statum Collegiatæ Ecclesiae redigeretur, gavisi fuerunt, quibusque aliae Archiepiscopales Ecclesiae regni praedicti circa Pharum, eorumque Archiepiscopi (non tamen titulo oneroso, vel privilegio particulari) gaudent, et gaudere poterunt, motu, scientia, et potestatis plenitudine similibus etiam perpetuo erigimus, et instituimus: illisque sic erectis et institutis, ipsius Ecclesiae Materanen universam provinciam, ac Suffraganeos omnes, et sin-

gulos Episcopos, quorum Cathedrales Ecclesiae in eadem provincia memoratae Acheruntinae Ecclesiae nuper adjecta consistant: nec non peculiarem, ut antea, Materanen Dioecesim cum omnibus et singulis in eadem Civitate Materanen supradictis, ac in praefata Dioecesi Materanen existentibus Ecclesiis, Coenobiis, Monasteriis (non tamen exemptis) Conservatoriis, et aliis quibuscumque etiam cum cura, et sine cura Saecularibus, et quorumvis Ordinum Regularibus Beneficiis, ac utriusque Sexus personis, habitatoribus, et incolis tam Laicis, quam Clericis, praesbyteris, beneficiatis, et religiosis quibuscumque cujusvis status, ordinis, et conditionis existunt, jurisdictioni, potestati, auctoritati, et superioritati ejusdem Camilli de novo ut infra futuri, et pro tempore extituri Praesulis Archiepiscopi Acheruntini, et Materanen ut infra nuncupari, Apostolica auctoritate praefata de novo pariter perpetuo subjicimus, atque supponimus: ac praefatam Materanen Archiepiscopalem, ut praefertur, nuncupandam Ecclesiam sic de novo erectam et institutam praedictae Archiepiscopali Ecclesiae Acheruntinae: ita quod illa ex nunc deinceps perpetuis futuris temporibus praefatae Ecclesiae Acheruntinae CONCATHEDRALIS nuncupari et denominari, ac vere, et realiter esse, et recognosci debeat: neque una alteri subsit, neque una ab altera dependeat: sed praefatus Camillus de novo ut infra futurus, et pro tempore extiturus illius Praesul Archiepiscopus Acheruntinus, et Materanen sit et esse censeatur. Ipseque in omnibus, et quibuscumque actibus ARCHIEPISCOPUS ACHERUNTINUS, ET MATERANEN nuncupari, et inscribi debeat pariformiter, et aequae principaliter, ut antea, motu, scientia, et potestatis plenitudine similibus de novo itidem perpetuo unimus, et conjungimus. Ac insuper supradictae Collegiatae Ecclesiae, ut praefertur, suppressae et extinctae Capitulum, et singulares personas illud componentes, ac respectivae tres Dignitates praedictas, quarum principalis ex nunc deinceps major post Pontificalem evadat; ac viginti septem Canonicatus, totidemque praebendas in Capitulum ejusdem Metropolitanae Ecclesiae Materanen, et respectivae in illius Dignitates; et Canonicatus, et praebendas cum omnibus et singulis bonis, redditibus, juribus, honoribus, praerogativis, privilegiis, et insigniis, quibus Capitulum primo dictum, antequam eadem Ecclesia Materanen ad Statum Collegiatae Ecclesiae redigeretur, quomodo libet potiebatur, eadem Apostolica auctoritate pariter perpetuo substitui-

mus, et subrogamus. In hac autem nova dictae Ecclesiae Materanen Metropolitanae reintegratione, erectione, unione, et respectiva subrogatione Nos nihil in reliquis circa Acheruntinam utpote antiquioris Ecclesiae praeminentias innovari volumus, sed omnia in pristinum statum restitui, et revocari mandamus. Eidem vero Camillo de novo ut infra futuro, et pro tempore exituro Archiepiscopo Acheruntino jus Seminarium erigendi pro pueris Acheruntinae Dioecesis alumnis nuncupandis quoque perpetuo reservamus. Quo Seminario quidem erecto, contributio pro parte Dioecesis Acheruntinae favore Seminarii Materanen praestari solita cesset eo ipso. Ac eosdem praesentes semper, et perpetuo validas, et efficaces esse, et fore; suosque plenarios, et integros effectus sortiri, et obtinere; ac ab omnibus et singulis, ad quos nunc spectat, et quomodolibet pro tempore spectabit, in futurum firmiter, et inviolabiliter observari debere: ac nullo unquam tempore ex quocumque capite, vel qualibet causa quantumvis juridica, et legitima, pia, privilegiata, etiam ex eo quod causae, propter quas praemissa emanarunt, adductae, verificatae, et justificatae non fuerint de subreptionis, vel obreptionis, aut nullitatis, vel invaliditatis, aut intentionis nostrae, seu quopiam alio quantumvis magno substantiali inexcogitato inexcogitabili, ac specialem, et individuum mentionem, et expressionem requirentem defectum, seu etiam ex eo quod in praemissis, eorumque aliquo solemnitates, et quaevis alia servari, et adimplenda, servata et adimplenda non fuerint; aut ex quocumque alio capite de jure, vel de facto, aut statuto, vel consuetudine, seu etiam enormis, enormissimae, totalisque laesionis, aut quocumque alio colore, praetextu, aliaque ratione, vel causa etiam quantumvis justa, rationabili, juridica, legitima, pia, privilegiata, etiam tali, quae ad effectum validitatis praemissorum necessario exprimenda foret, aut quod de voluntate nostra, et aliis superius expressis nullibi appareret, seu alias probari posset, notari, impugnari, invalidari, retractari, in jus vel controversiam revocari, aut ad viam, et terminos juris reduci, aut adversus illas restitutionis in integrum, apositionis oris, reductionis ad viam, et terminos juris, aut aliud quodcumque juris vel facti, aut gratiae, vel iustitiae remedium impetrari, seu quomodolibet etiam motu, scientia, et potestatis plenitudine paribus concessae, et impetratae vel emanatae quempiam uti, seu se juvari in iudicio, vel extra

illud posse : neque easdem praesentes sub quibusvis similibus , vel dissimili-
 jium gratiarum revocationibus , suspensionibus , limitationibus , modifica-
 tionibus , derogationibus , aliisque contrariis dispositionibus per quascum-
 que Literas , et Constitutiones Apostolicas , aut Cancellariae Apostolicae
 regulas quondocumque etiam in crastinum Assumptionis nostrae , et suc-
 cessorum nostrorum Romanorum Pontificum ad praefati Apostolatus ap-
 pem etiam motu , scientia , et potestatis plenitudine paribus etiam Con-
 sistorialiter ex quibuslibet causis , et sub quibuscumque verborum ex-
 pressionibus , tenoribus , et formis , ac cum quibusvis elusulis , et de-
 cretis etiam in eisdem praesentibus , eorumque toto tenore , ac data spe-
 cialis mentio fiat , editas et in posterum edendas comprehendit ; sed sen-
 per et omnino ab illis excipi ; et quoties illae emanabuntur , toties in
 pristinum , et validissimum statum restitutas , repositas , et plenarie reinte-
 gratas esse et fore . Sicque et non alias per quoscumque Judices ordina-
 rios , vel delegatos etiam Causarum Palatii Apostolici Auditores , ac praefa-
 tae S. R. E. Cardinalis etiam de latere Legatos , Vice-Legatos , dictaeque
 Sedis Nuntios , aliosque quoscumque quavis auctoritate , potestate , faculta-
 te , praerogativa , ac privilegio fulgentes , sublata eis , et eorum cuilibet
 quavis aliter judicandi , et interpretandi facultate , et auctoritate in quo-
 cumque judicio , et in quacumque instantia judicari et definiri debere ; et
 quicquid secus super his a quoquam quavis auctoritate scienter , vel igno-
 ranter contigerit attentari , irritum et inane decernimus . Et nihilominus
 ad ejusdem Metropolitanae Ecclesiae Materanen a novis illius erectione , et
 institutione per Nos , ut praefertur , factis hujusmodi Pastoris solatio de-
 situtae provisionem paternis et sollicitis studiis intendentes , eidem Me-
 tropolitanae Ecclesiae Materanen de persona antedicti Camilli Archiepiscopi
 Acheruntini motu , scientia , et potestatis plenitudine similibus providemus ;
 praefataeque Metropolitanae Ecclesiae Materanen eundem Camillum Ar-
 chiepiscopum de novo in Archiepiscopum praeficimus , et Pastorem , cu-
 ram , regimen , et administrationem ipsius Metropolitanae Ecclesiae Mate-
 ranen ei in spiritualibus , et temporalibus etiam de novo plenarie commit-
 tendo . Quocirca Majestatem Regiam praedicti FERDINANDI Regis rogamus ;
 et hortamur attente , quod praefatum Camillum Archiepiscopum , et praef-
 atam Metropolitanam Ecclesiam Materanen suae curae commissam habens ,

pro nostra et Sedis Apostolicae praefatae reverentia propensius commendatas in ampliandis, et conservandis juribus suis; sic eundem Camillum Archiepiscopum, et praefatam Metropolitanam Ecclesiam Materanen sui benigni favoris auxilio prosequatur, quod idem Camillus Archiepiscopus ejus Celsitudinis fultus praesidio in sibi de novo commisso curae Pastoralis officio possit, Deo propitio, prosperari, ac sibi exinde a Deo perennis vitae praemium, et a Nobis condigna proveniat actio gratiarum. Ac insuper Venerabilibus pariter Fratribus universis suffraganeis Metropolitanae Ecclesiae Materanen universitatem eorum monentes, et hortantes attente per Apostolica scripta mandamus, quatenus eidem Camillo Archiepiscopo tamquam membra capiti obsequentes exhibeant sibi obedientiam, et reverentiam debitas, et devotas; ita quod mutus inter dictum Camillum Archiepiscopum, et ipsos gratia gratos sortiatur effectus: et Nos propterea ipsos, et eorum devotionem possimus in Domino merito commendare. Dilectis vero Filiis Capitulo, et Vassallis Metropolitanae, ac Clero, et Populo Materanen respective Civitatis, et Dioecesis per eadem Apostolica scripta mandamus, ut Capitulum tamquam Patri, et Pastori animarum suarum humiliter intendentes exhibeant eidem Camillo Archiepiscopo obedientiam, et reverentiam debitas ac devotas: ac Clerus praefatus eundem Camillum Archiepiscopum pro nostra, et praefatae Sedis Apostolicae reverentia benigne recipientes, et honorifice pertractantes ejus salubria monita, et mandata suscipiant, humiliter et efficaciter adimplere procurant: Populus autem eundem Camillum Archiepiscopum tamquam patrem, et Pastorem animarum suarum devote suscipientes, et debita honorificentia prosequentes ejus monitis salubribus humiliter intendant; ita quod Camillus Archiepiscopus praefatus in eis devotionis filios, et ipsi in eo per consequens patrem benevolum invenisse gaudeant respective. Vassalli vero praefati eundem Camillum Archiepiscopum debito honore prosequentes ei fidelitatem solitam, nec non consueta servitia, et jura sibi ab eis debita integra exhibere studeant. Alioquin sententiam, sive paenam, quam ipse Camillus Archiepiscopus respective tulerit, seu statuerit in rebelles, ratam habebimus, et faciemus, auctore Domino, usque ad satisfactionem condignam inviolabiliter observari; non obstantibus primodictis nostris literis, et Lateranensis Concilii novissime celebrati untones perpetuum, nisi in casibus

a jure permisos fieri prohibentibus , aliisque etiam Synodalibus , provin-
 cialibus , generalibus , Universalibusque Conciliis editis , vel edendis , spe-
 cialibus , vel generalibus Constitutionibus , et Ordinationibus Apostolicis ,
 privilegiis quoque , indultis , et literis Apostolicis quibusvis Superioribus ,
 et personis sub quibuscumque tenoribus , et formis , ac cum quibusvis
 etiam Derogatoriis derogatoriis , aliisque efficacioribus efficacissimis , et
 insolitis clausulis , irritantibusque , et aliis decretis in genere , vel in spe-
 cie , etiam motu , scientia , et potestatis plenitudine ejusdem pro tempore
 concessis , et concedendis ; quibus omnibus et singulis etiamsi pro illorum
 sufficienti derogatione alias de illis , eorumque totis tenoribus specialis ,
 specifica , expressa , et individua , non autem per clausulas generales idem
 importantes mentio ; seu quaevis alia exquisita forma ad hoc servanda fo-
 ret . Tenores hujus modi , ac si de verbo ad verbum nihil penitus omis-
 so , et forma in illis tradita observata etiam inserti forent eidem prae-
 sentibus pro plene , et sufficienter expressis , et insertis habentes , illis
 alias in suo robore permansuris latissime , et plenissime ad praemissorum
 omnium et singulorum validissimum effectum , ac specialiter , et expresse ,
 nec non opportune et valide hac vice dumtaxat motu , scientia , et pote-
 statis plenitudine paribus harum quoque serie derogamus , contrariis qui-
 buscumque . Nos enim ad hoc ut praemissa omnia super novis erectione a
 et unione hujusmodi , et circa ea per Nos , ut praefertur , disposita suum
 rite sortiantur effectum , praefatum Innicum Didacum Episcopum Cardina-
 lem in executorem praesentium nostrarum literarum Apostolica auctoritate
 praefata constituimus , et deputamus ; eidemque ut ipse pro hujusmodi exe-
 cutionis effectu quaecumque Ecclesiasticam personam in dignitate Eccle-
 siastica constitutam subdelegare libere et licite possit , ea valeat , plenam
 et omnimodam facultatem per easdem praesentes concedimus , et imparti-
 mur . Ex pro eo quod Acheruntina Civitas prae incolarum numero , plu-
 rium eorumdem familiarum etiam Nobilium divitiis , aedificiorum elegan-
 tia , satis amplo maeniarum circuitu , multimodisque aliis floriditatis quali-
 tatibus ita feliciter huc usque , Deo dante , excrevit , ut ab eo , in quo
 tunc cum Materanen Ecclesia in Cathedralera primitus erecta , praedictae-
 que Ecclesiae Acheruntinae unita fuit , statu , in meliorem sane ac vere
 conspicuum commutatu esse dignoscitur ; volumus , quod praefatus Camil-

Ius de novo futurum, et pro tempore existentes Archiepiscopi Acheruntini, et Materanenses, dummodo tamen eisdem de congruo eorumque dignitati respondente habitatione provisum existat, in eadem Civitate Acheruntina per quatuor circiter anni menses residentiam facere teneantur, et non alias. Volumus etiam, quod earundem præsentium Transumptis etiam impressis manu alicujus Notarii publici subscriptis, et sigillo personæ in simili dignitate Ecclesiastica constitutæ munitis eadem prorsus fides in iudicio, et extra illud adhibeatur, quæ eisdem originalibus literis adhibetur, si forent exhibitæ, vel osiense. Nulli ergo omnino hominum liceat hanc paginam nostræ revocationis, annulationis, destitutionis, vacationis, declarationis, suppressionis, extinctionis, restitutionis, reintegrationis, erectionis, institutionis, subjectionis, suppositionis, unionis, conjunctionis, substitutionis, subrogationis prioris, et posterioris voluntatis, mandati, reservationis, decreti, deputationis, facultatis, impartitionis, et derogationis infringere, vel ei ausu temerario contraire. Si quis autem hoc attentare præsumperit, indignationem Omnipotentis Dei, ac Beatorum Petri, et Pauli Apostolorum ejus se noverit incursurum. Datum Romæ apud S. Mariam Majorem an. Incarnationis Dominicæ millesimo octingentesimo decimo octavo, quintodecimo Kal. Aprilis, Pontificatus nostri anno decimo nono, Loço ✠ Plumbi.

Cum autem idem SS. Dominus noster pro harum Apostolicarum litterarum executione Nos eligere, ac deputare dignatus sit, utentes facultatibus a Sanctitate Sua Nobis specialiter delegatis, præsentis decreti nostri vigore decernimus ea omnia executioni mandanda esse, quæ in ipsis literis disposita, statuta, decreta sunt pro nova erectione, seu reintegratione Pontificalis Cathedræ in Civitate Materanen cum unione aque principaliter Acheruntinæ Ecclesiæ sub moderno, ac pro tempore existente Acheruntino Præsule tamquam uno eademque Pastore iis modo ac formis, quibus eadem unio ante præfatum suppressionem, extinctionem, et applicationem existerat, iis exceptis, quæ Præsulis residentiam respiciant, ut infra.

Et cum eadem Sanctitas Sua potestatem Nobis fecerit subdelegandi aliam personam in Ecclesiastica dignitate constitutam ad ea perficienda, quæ Nobis commissæ sunt; hinc Nostri hujusmodi decreti vigore modernam Archiepiscopum Acheruntinum subdelegamus, eique committimus, ut debita

methodo, ac rite omnia peragat, quae in literis Apostolicis continentur; ad hoc ut Materanen Ecclesia in eundem statum, et conditionem revocetur, in quibus erat, antequam ad statum Collegiatae Ecclesiae per memoratas Apostolicas literas incipientes — DE UTILIORI — redigeretur; ita ut eadem Materanen Ecclesia in posterum Archiepiscopalia nuncupari ut esse debeat cum Sede Archiepiscopali, et Cathedra, cum peculiari suo territorio, seu Dioecesi, ut antea, existenti: et praesertim ut Capitulum, et singulas personas illud componentes, ac respective Dignitates, Canonicos; et praebendas Ecclesiae Materanen in Capitulum ejusdem Archiepiscopalia Ecclesiae Materanen, et respective in illius Dignitates, Canonicos, et praebendas cum omnibus et singulis bonis, redditibus, juribus, honoribus; praerogativis, privilegiis, insigniis, quibus gaudebat, antequam in statum Ecclesiae Collegiatae redigeretur, restituere subdelegata Apostolica auctoritate possit, et valeat.

Praefatam Archiepiscopalem Materanen Ecclesiam sic de novo erectam; et institutam Archiepiscopali Ecclesiae Acheruntinae ex tunc deinceps perpetuis futuris temporibus aequae principaliter unitam, et ejusdem Acheruntinae Ecclesiae Concathedralem nuncupari, denominari, ac vere et realiter esse, et recognosci Apostolica delegata auctoritate praecipimus, ac mandamus. Moderno vero Archiepiscopo Acheruntino, quem SS. Dominus noster per praefatas literas de novo in Archiepiscopum Metropolitanae Ecclesiae Materanen praeficere dignatus est, ipsius Materanen Ecclesiae curam; regimen, administrationem eadem delegata Apostolica auctoritate committimus cum iis omnibus et singulis juribus, officiis, insigniis, jurisdictionibus, praecminentis, praerogativis, privilegiis, et indultis realibus, personalibus, et mixtis, quibus idem gavisus est, antequam Materanen Ecclesia ad statum Ecclesiae Collegiatae fuerit redacta, et quae fusiis in insertis Apostolicis literis continentur.

Insuper utentes facultatibus a Sanctitate Sua Nobis tributis decernimus, quod modernus, et pro tempore existens Antistes Ecclesiarum Archiepiscopali Acheruntinen, et Materanen in omnibus actibus utriusque Ecclesiae titulum apponere, et in utraque proprium Capitulum, nec non distinctam Curiam, et peculiarem Vicarium generalem habere debeat, reservato perpetuo jure eidem moderno et pro tempore existente Archiepiscopo Semi-

narium erigendi pro pueris Acheruntinae Dioecesis : quo Seminario erecto contributio pro parte Dioecesis Acheruntinae favore Seminarii Materanen praestari solita cesset eo ipso .

Modernus vero ac pro tempore existentes Acheruntini , ac Materanenses Archiepiscopi in Civitate Acheruntina residentiam habere debebunt per quatuor circiter menses cujuslibet anni , dummodo tamen eisdem de congrua , eorumque dignitati respondente habitatione provisum fuerit .

Peculiarem ut antea Materanensem Dioecesim cum omnibus et singulis in Civitate , et praefata Dioecesi Materanen existentibus Ecclesiis , Coenobiis , Monasteriis , Conservatoriis , et aliis quibuscumque utriusque sexus personis , habitatoribus , et in eolis tam laicis , quam clericis , presbyteris , beneficiatis , et religiosis cujuscumque status , ordinis , et conditionis jurisdictioni , potestati , auctoritati , et superioritati moderni de novo instituti Archiepiscopi Materanen , ut saepe memoratis literis de Apostolica delegata auctoritate perpetuo denuo subjicimus , atque supponimus .

Haec autem omnia tam in insertis Apostolicis literis , quam in praesenti Decreto contenta ab iis , ad quos spectat , inviolabiliter observari volumus ; non obstantibus quibuscumque in contrarium facientibus etiam speciali , et individua mentione dignis , ac praesertim Apostolica Constitutione incipiente -- DE UTILIORI -- caeterisque , quae Sanctitas Sua in dictis literis voluit non ob stare .

In quorum fidem praesentes manu nostra signatas nostro sigillo per infrascriptum Secretarium nostrum muniri mandavimus . Datum Neapoli ex Aedibus nostrae Residentiae die 25. Aprilis 1819 .

Adest Regium Beneplacitum expeditum sub die sexta mensis Aprilis 1819 . , neq non permissio , ut imprimatur , Directoris Politiae Regni generalis die 21. Maii 1819 . fol. 39. n. 458 .

I. D. CARDINALIS CARACCILO .

A. P. RETRVS BALDASSARI Secretarius ,

Loco ✕ Sigilli ,

~~347866~~



VA4
1523686

NEAPOLI X Ex Typographia de Dominici X MDCCCXIX.